



Kada neko dođe u džamiju neka pogleda, pa ako na obući/papučama vidi izmeta ili nečisti, neka je obriše i neka klanja u njoj.

Ebu Seid el-Hudri, radijallahu 'anhu, je kazao: "Allahov Poslanik, sallallahu 'alejhi ve sellem, je jednom prilikom, klanjući sa ashabima, izuo obuću/papuče i stavio ih na svoju lijevu stranu. Kada to vidješe, i ostali poizuvaše svoju obuću/papuče. Kada je Allahov Poslanik, sallallahu 'alejhi ve sellem, završio s klanjanjem, upita: 'Zbog čega ste izuli obuću/papuče?' Rekoše: 'Vidjeli smo tebe da si izuo svoje, pa smo i mi, slijedeći te, poizuvali svoje.' Allahov Poslanik, sallallahu 'alejhi ve sellem, reče: 'Došao mi je Džibril i obavijestio me da na mojim ima izmeta (ili je kazao: nečisti).' Rekao je i ovo: 'Kada neko dođe u džamiju, neka pogleda u svoju obuću/papuče, pa ako na njima primijeti izmet ili nečist, neka ih obriše i neka klanja u njima.'"

[Vjerodostojan] [Hadis bilježi Ebu Davud - Hadis bilježi imam Ahmed - Hadis bilježi Darimi]

Allahov Poslanik, sallallahu 'alejhi ve sellem, je jedne prilike klanjao sa ashabima, zatim je iznenada izuo obuću/papuče stavljući ih sa svoje lijeve strane. Vidjevši to, ashabi izuše svoju obuću ponukani primjerom Poslanika, sallallahu 'alejhi ve sellem. Završivši sa namazom, Poslanik, sallallahu 'alejhi ve sellem, se osvrnuo i vidjevši ih u drugačijem stanju nego kada su ušli u namaz, i upita ih za razlog njihovog izuvanja obuće. Odgovorili su mu: "Vidjeli smo te da si izuo svoju obuću pa smo i mi izuli svoje.", odnosno tebe smo slijedili. Oni su pomislili da je derogiran propis dozvole klanjanja u obući, pa im Poslanik, 'alejhisselam, objašnjava razlog njegovog izuvanja riječima: "Došao mi je Džibril obavještavajući me da je na mojoj obući izmet" - ili je rekao nečist. Znači da je Džibril, 'alejhisselam, došao Vjerovjesniku, sallallahu 'alejhi ve sellem, dok je bio u namazu obavještavajući ga da se sa njegovom obućom ne može klanjati namaz zbog izmeta ili nečisti (ovo je nesigurnost od prenosioca predaje). Zatim je Poslanik, sallallahu 'alejhi ve sellem, rekao: "Kada neko dođe u džamiju neka pogleda obuću, pa ako vidi izmet ili nečist, neka je obriše i neka klanja u njoj." Znači, ako hoće da uđe u džamiju u obući i klanja u njoj, onda mu je obaveza (vadžib) pregledati obuću i ako vidi izmet ili nečist, onda će je obrisati o zemlju, ili očistiti na drugi način i tek onda može klanjati u njoj. Hadis ne znači da se mora klanjati u obući, nego samo da se u njoj može klanjati, ali ako hoće klanjati u njoj, onda mu je obaveza da bude siguran u njenu čistoću i tek onda u njoj može klanjati, ako to želi. Onaj ko klanja a ne vodi računa o nečisti, bilo da se radi o obući, pokrivaču glave, kapi, odjeći, potom sazna za nju u vrijeme dok je u namazu neodložno će je nastojati otkloniti. Ako se radi o nečisti na odjeći, hlačama i sl., i bude moguće to skinuti, s tim da se ne otkrije avret, skinuće to nastavljući sa namazom, koji ne mora ponavljati. A ako ne bude mogao skinuti odjeću osim da se ukaže

avret, onda će prekinuti namaz, ponovo se propisno obući prekrivajući avret i ponovo klanjati.

<https://www.sunnah.global/hadeeth/bs/show/10648>

النّجّاة الخيريّة
ALNAJAT CHARITY

